

आकाशवाणी

पैहले खास-खास खबरां

1. प्रधानमंत्री नरेन्द्र मोदी होंरें नोयडा अंतराष्ट्री हवाई अड्डे दे पहले चरण दा उदघाटन उत्तर-प्रदेश दे गौतम बुद्धा नगर जिला दे ज़ेवार च किता-मोदी होंरें आखेआ इस हवाई अड्डे कन्नै पश्चिम उत्तर प्रदेश दे करसाने-लौहके ते दरम्यानं उद्योगें ते नौजवानें गी नमें मौके थहोगंन।
2. इंडिगो डोआरी ईजन फेल दी शंका दे चलदे दिल्ली हवाई अड्डे पर आपातकालीन स्थिति च उतरी।
3. नेपाल दे साबका प्रधानमंत्री के.पी. शर्मा ओली होंरें गी ज़ेनजी प्रदर्शनें च कथित शमूलियत दे आरोप पर गिरफ्तार करी लैता गया ऐ।
4. येमेन दे होउथी विद्रोही इजरायल पर पहला मिसाइल हमला करने कन्नै पश्चिम एशिया च चला'रदे टकराव च शामिल होए।
5. IPL क्रिकेट दा 19मां संस्करण बंगलुरु च अज्जे कोला शुरु। उदघाटन मैच शामी साड्डे 7 बजे शुरु होग।

<><><><><><>

PM -Jawar Airport

प्रधानमंत्री नरेन्द्र मोदी होंरें उत्तर प्रदेश दे गौतम बुद्धा नगर जिले च नोयडा अंतराष्ट्री हवाई अड्डे दे पहले चरण दा उदघाटन कीता। उ'नें 40 एकड़ दे रख-रखा- मुरम्मत ते सुविधा (MRO Facility) दा बी नीह पत्थर रखेआ। इस मौके बोलदे होई मोदी होंरें

आखेआ ऐ “विकसित उत्तर प्रदेश -विकसित भारत” मुहिम दा नमां अध्याय ऐ। प्रधानमंत्री होरें आखेआ- उत्तर प्रदेश हुन भारत च सब्बनें शा मते अंतराश्ट्री हवाई अड्डे होने आला राज्य बना रदा ऐ ते इस नमें हवाई अड्डे कन्ने पच्छिमी उत्तर प्रदेश गी खरा मता बाद्दा होग- जेदे च आगरा- मथुरा- अलिगढ़- गाजियाबाद- इटावा ते फरीदाबाद शामिल न। मोदी होरें आखेआ जे इस हवाई अड्डे कन्ने करसाने-लौहके ते दरम्यानं दर्जे दे उद्योगें गी नमें मौके थोगंन ते पच्छिम उत्तर-प्रदेश दे नौजवानें दा बी बाद्दा होग। उ’नें आखेआ जे जेबाड़ हवाई अड्डा उत्तर प्रदेश दे विकास ते बाद्दे दा प्रतिक बनोग। प्रधानमंत्री होरें आखेआ जे पिच्छले इक महीने थमां पच्छिमी एशिया च चला’रदे युद्ध करिए मते सारे देश जरूरी चीजें दी कमी कारण परेशान न- जियां खाद्य समग्री- पेट्रोल- डीजल गैस ते खाद। उ’नें जोड़ेया जे हर देश इस संकट कन्ने निबड़ने आस्तै कोशिश करा’रदा ऐ। प्रधानमंत्री होरें जोर देइयें आखेआ जे भारत इस संकट दा पूरी शक्ति कन्ने मुकाबला करा’रदा ऐ- जेदी शक्ति ओदे बसनीके दी शक्ति पर निर्भर ऐ।

<><><><><><><>

PM- Mazboot Samvaad

प्रधानमंत्री ते बी.जे.पी दे वरिष्ठ नेता नरेन्द्र मोदी होरें असम ते पुडुचेरी दे पार्टी कार्यकर्ताएं गी इस महीने दी 30 तरीख गी “मेरा बूथ -सबसे मज़बूत” संवाद एह नमीं ऐप्प राएं सम्बोधन करगंन। इक सोशल मीडिया पोस्ट च मोदी होरें आखेआ जे असम च पिच्छले इक दहाके च होए दे विकास सारें दिक्खेआ ऐ ते बक्ख-बक्ख क्षेत्रें च होए दे

विकास नै राज्य दी पंछान बनाई ऐ। मोदी होरें आखेआ विकास कम्में करिए लोक अगले 5 बरें आस्तै बी डबल ईंजन NDA सरकार गे चाहंदे न। इक दुई पोस्ट च मोदी होरें आखेआ दुनी रफ्तार कन्नै कम्म करने आली NDA सरकार ने पुड्डुचेरी दे लोकें दी आसां-तांगा पिच्छले 5 बरें च पूरी कितियां न। उ'ने पुड्डुचेरी दे पार्टी कार्यकर्ताएं कन्नै गल्लबात करने च अपनी दिलचस्पी जाहिर कीती।

<><><><><><>

Assembly Polls

केरल-पुड्डुचेरी ते असम च विधान सभा चुनाव 9 अप्रैल गी होगंन ते वोटें दी गिनतरी 4 मई गी कीती जाग। चुनावी हलके बारे साड़ी खास श्रंखला दे हिस्से दे तौर पर अज्ज अस्स केरल दे तिरुवंनथपुरम जिले दे नेमोम चुनावी हलके दी गल्ल करगे। नेमोम हलके च 10 उम्मीदवार चुनावी मैदान च खड़ोते दे न। बी.जे.पी दे राज्य प्रधान राजीव चन्द्रशेखर NDA दे उम्मीदवार न। CPM नेता ते मौजूदा सरकार च मंत्री वी. सीवानकुट्टी LDF दे तरफा चुनाव लड़ा रदे न। UDF ने कांग्रेस नेता- के.एस. सवारी नाधन गी उम्मीदवार चुनेया ऐ। SUCI Communist तरफा करनामन्ना प्रसाद, AAP तरफा के. वीणु- The Future India Party बक्खियां- एस.एम सूबी ते 4 निर्दलीय उम्मीदवार बी चुनाव मैदान च उतरदे न। वी.सीवनकुट्टी नेमोम चुनावी हलके दे मौजूदा विधायक न। पिच्छले विधान सभा चुनाव च उनें 3 जहार 9 सौ 49 वोटें कन्नै जित हासल कीती ही। बी.जे.पी दे कुम्मानम राजासेखरन दुई थाहर पर ते कांग्रेस दे के. मुरलीधरन त्री थाहर पर रेय हे।

<><><><><><>

PM-MKB

प्रधानमंत्री नरेन्द्र मोदी होर 29 मार्च बड़डलै 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै अपने विचार सांझे करगंन। हर महीने दे खीरी ऐतवार गी प्रसारत होने आहले इस कार्यक्रम दी एह 132मीं किश्त होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाईट ते न्यूज ऑन ए.आई.आर mobile app- डी.डी न्यूज- प्रधानमंत्री हुंदे दफतर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे बाद एहदा डोगरी भाशा च अनुवाद प्रसारित कीता जाहग।

<><><><><><>

Indigo -Emergency Landing

दिल्ली दी बक्खी ओंदी इक डोआरी ने अज्ज इंदिरा गांधी अंतराश्ट्री हवाई अड्डे दिल्ली पर आपातकाल लैंडिंग किती- जेदी वजह इक ईंजन दे फेल होने दी शेंका ही। ए डोआरी विशाखापट्टम थमां इक सौ 61 सवारियें गी लेइयै आवा'रदी ही। सरबंधत मंत्रालय दे मुताबक हवाई जहाज सवेरे 10 बज्जियै 54 मिन्टें पर सुरक्षित तरीके उतरेया ते बाकी चीजां बी सामान्य हियां। तौंआई दिल्ली अग्ग साहलने सरबंधत सेवा ते जानकारी दिती ऐ जे आयातकालीन लैंडिंग दी सूचना थहोने मगरा तुरत अग्ग साहलने आले तंत्र गी भेजेया जाग। हवाई जहाज सुरक्षित तरीके थल्ले उतरेया ते कुसा बी नुकसान दी कोई खबर नैई ऐ।

<><><><><><><><>

Ex-PM Nepal Arrested

नेपाल दे साबका प्रधानमंत्री के.पी. शर्मा ओली होरें गी पिच्छले बरे उत्थे होए दे हिंसक जेनजी प्रदर्शनं च कथित शमूलियत दे आरोप च अज्ज बड्डलै गिरफ्तार करी लैता गया ऐ। उन्दी गिरफ्तारी बालेन्द्र शाह हुंदे देश दे सब्बनें शा लौहकी उम्मी दे प्रधानमंत्री दे तौरा पर संगंध लैने दे इक ध्याड़े बाद होई ऐ। भक्तपुर जिला पुलस रेंज दे प्रमुख पुलस कमीशनर सूर्य बहादुर खडका हुंदे मुजब साबका प्रधानमंत्री होरे गी उन्दे घरा गिरफ्तार कीता गया ऐ।

<><><><><><><><>

Nepal PM -Thanks Modi

नेपाल दे नमें प्रधानमंत्री बलेन्द्र शाह होर प्रधानमंत्री नरेन्द्र मोदी हुंदा बधाई सनेह आस्तै धन्यवाद किता ऐ। उ'नें दवे देशे बश्कार बहु-उद्देशीय तालमेल गी मजबूत करने दी उम्मीद जताई। उ'नें आखेआ जे ओ आपसी रिश्ते गूढे ते सांझी खुशहाली दे बाददे आस्तै भारत कन्नै रलियै कम्म करना चाहंदे न। प्रधानमंत्री नरेन्द्र मोदी होरें राष्ट्री स्वतंत्रता पार्टी दे नेता बलेन्द्र शाह होरेंगी नेपाल दे प्रधानमंत्री बनने पर अपनी शुभकामनां भेंट कीतियां हियां।

<><><><><><><><>

Murshidabad Arrests

मुर्शीदाबाद च रघुनाथगुन्जे घटना च गिरफ्तारियें दी गिनतरी 30 तोड़ी पुज्जी गेई ऐ-
इंदे चा 2 धार्मिक संगठनें दे नेता न। पुलस ने तपाशी अभियान जारी रखेदा ऐ। सोशल
मीडिया पर मौजूद विडियो दे जरिए संदिग्धएं दी पंछान कीती जा'रदी ऐ। केन्द्री बल
क्षेत्र च तैनात न। मुर्शीदाबाद दे DIG अजित सिंह यादव होर बी क्षेत्र च गै मौजूद न।

<><><><><><>

Shah- Janogoner Chargesheet

वरिष्ठ बी.जे.पी नेता ते केन्द्री गृहमंत्री अमित शाह होर अज्ज कोलकाता च जोनोगोनेर
चार्जशीट कार्यक्रम च शामिल होए। शाह होरें आखेआ जे पश्चिम बंगाल दे विधानसभा
चुनाव छड़े बंगाल आस्तै नेही सगुआं पूरे देश आस्तै महत्वपूर्ण न। उ'नें पश्चिम बंगाल
च गैर-कनूनी तरीके लोकें दी आओ-जाई- आर्थिक दबाव पर लौ पाई। उनें आखेआ-
असम च बी.जे.पी. दे सरकार च आने दे बाच गैर-कनूनी लोकें दी आओ-जाई पूरी चाली
खत्म होई ऐ।

<><><><><><>

Goyal-WTO

केन्द्री बंज बपार ते उद्योग मंत्री पीयूष गोयल होरें आखेआ जे विश्व बपार संगठन
(WTO) च चर्चा च Uruguay Round दौरान पैदा होए दे असंतुलन गी दूर कीता जाना
लोड़चदा ऐ। उ'नें जोर देइयै आखेआ जे सब्बनें मिम्बर मुल्खें दी उत्पादक समर्थ बधाने-
नौकरियां पैदा करने ते कुल संसारी बपार च हिस्सा लैने दा सेंई मौका थहोना लोड़चदा

ऐ। मंत्री होंरें आखेया जे बहुपक्षीय बपार प्रणाली गी इस गल्लै गी यकीनी बनाना लोड़चदा ऐ जे नवाचार- विकास ते मौके- सदस्य मझाटें बरोबर बंडे जाने लोड़चदे। गोयल होंरें रचनात्मक तरीके कन्नै जुड़ने दी भारत दी वचबद्धता गी फही पक्का कीता तांजे विश्व बपार संगठन वैश्विक स्तरै पर इक केन्द्रीय भूमिका अदा करदा रवै।

<><><><><><>

LG- Nasha Mukht

उपराज्यपाल मनोज सिन्हा होंरें अज्ज लोक भवन जम्मू च इक उच्ची सतह दी बैठक दौरान जम्मू-कश्मीर च नशा-मुक्त भारत अभियान दी प्रगति दा जायजा लैता। उपराज्यपाल होंरें जम्मू-कश्मीर दे नौजवानें गी नशाना बनाने आलें नशीलें पदार्थें दी तस्करी सरबंधत नैटवर्क पर सख्त कारवाई करने दा निर्देश बी दिता। उंनै आखेआ जे समाज-वरोधी तत्वे आसेआ- नौजवानें गी नशें दी लत आले इक खूह च धकेलने दी कोश्ट कीती जा'रदी ऐ ते असेंगी हर हाल च उसी रोकना होग ते एहदे लेई व्यापक ते सावधानी कन्नै त्यार कीती गेदी बहु-आयामी कार्य-योजना दी फौरी तौरा पर लोड़ ऐ।

<><><><><><>

Jammu Intl Marathon

जम्मू च कल आयोजित होने आली पैहली-पैहली अंतराष्ट्री Half मैराथन लेई सब्बै त्यारियां करी लैती गेदियां न। देश-बदेश थमां तकरीबन 4 जहार धावकें दे एहदे च हिस्सा लैने दी मेद ऐ। इस आयोजन च खेड्ढ सैलसफा दे प्रति जम्मू-कश्मीर दी प्रतिबद्धता गी दर्शाया जा करदा ऐ। जम्मू च पैहली बारी आयोजित होने जा रदी इस

हाल्फ मैराथन च 21 किलोमीटर- 10 किलोमीटर ते 5 किलोमीटर आलियां द्रौड़ा शामिल होगंन ते जेतुएं गी कुल इक करोड़ 33 लक्ख रुपें दा ईनाम बी बंडेया जाग।

<><><><><><>

West Asia Conflict

पश्चिमी एशिया च क्षेत्री टकराव येमेन दे हायोथी विरोधियें कन्नै तेज होई गया ऐ- जिनें 2014 थमां गै राजधानी पर कब्जा कीते दा ऐ। इनें अज्ज बड्डलै इजरायल पर पहली मिसाइल दागी ते युद्ध च औपचारिक तौर पर शामिल होई गे। पिच्छली रातीं ईरान ने हेजबोल्ला बश्कार तेज टकराव कन्नै हालात गंभीर होई गए न। पहले हायोथी-सउदी अरब कन्नै लम्बे चिरे दे युद्ध विराम करी इस जंग च सीद्दे तौर पर शामिल नेही हे- हायोथी दे सैन्य प्रवक्ता नै ईरान दे सहयोग दी योजना सांझा कीती ऐ। रेडसी च बंदरगाह पर हायोथी ड्रोनै हमले कारण तकरीबन इक ट्रीलियन अमरीकी डालर दा सालाना वैश्विक बपार च नुकसान होआ ऐ।

<><><><><><>

West Asia Tension –Escalation

पच्छिमी एशिया च संकट होर बदा'रदा ऐ दोबारा मिसाइल ते ड्रोन हमले- खाड़ी दे हिस्सें च टकराव ते हेज़बुल्ला- लेबनान पर इजरायली हमले जारी न। लेबनान दे प्राधिकरण नै बैरुत ते दक्खन लेबनान च इजरायली हमले करी होई दी मौतें दी जानकारी दिती ऐ। हैज़बुल्ला नै बी उत्तर इजरायल पर हमले किते। इजरायली अधिकारियें टकराव दे मौजूदा चरण च येमेनी थमां पैहली मिसाइल लांच करने दी गल्ल

गी पक्का किता ऐ- जेड़ा भूगौलिक संकट गी होर गूढा करोग। इजरायल च कुसा ताजा नुकसान दी खबर नैई ऐ- इस लांच कन्ने बाद्दू फ्रन्ट खुलने बारे चिंता बी बदी गई ऐ। संयुक्त अरब अमीरात च वायु सुरक्षा प्रणालिये अज्ज बड्डलै मिसाइलें ते ड्रोने दा मुकाबला किता। किश थाहरें बसनीकें गी आपातकाल अलर्ट बी जारी कीता गया। हवाई हमले दे मल्बे दे डिगने करी औद्योगिक क्षेत्र च खलीफा आर्थिक क्षेत्रें- अबूधाबी च 5 भारती घायल होई गे न। कुसा जान दे नुकसान दी खबर नैही ऐ।

<><><><><><>

Shah -West Asia

गृहमंत्री अमित शाह होरें आखेआ ऐ जे पच्छिम एशिया च बने दे तनोतनी आहले हालात करी आलमी सतह पर पेश आवा करदी दिक्कतें-रुकावटें दे बावजूद भारत च आम जन-जीवन पर कोई असर नैई पेआ ऐ ते साढ़े देसै- संकट दी इस घड़ी दरान बड़ा खरी चाल्ली कम्म कीता ऐ। कल संजा नमीं दिल्ली च इक निजी मीडिया घराने दे सम्मेलन दरान बचार सांझे करदे होई शाह होरें आखेआ जे पिच्छले इक दहाके दे दरान पेट्रोलियम रिज़र्वे गी तगड़ा बनाने दे सरकार दे ठोस जतनें दी बदौलत गै आपूर्ति च स्थिरता जकीनी बनी सकारदी ऐ। श्री शाह होरें आखेआ जे केईयें होरनें मुख्यें च ईधन दिये कीमतें च तगड़ा बाद्दा दिक्खने गी लब्बा ऐ। उत्थै गै भारत नै पेट्रोल ते डीज़ल दिएं कीमतें गी तकरीबन स्थिर रक्खदे होई आपूर्ति श्रंखला बी बवस्थित ढंग्गै नै बरकरार रक्खे दा ऐ। उनें आखेआ जे केइएं मुख्यें च ईधन दे इस्तेमाल पर बंदिशां ते इमरजेंसी हीलें लागू कीते गे न पर भारत ने संकट दे इस समे दरान बी अपनी चाल

बरकरार रक्खी दी ऐ ते अपने बसनीकेँ गी विपदा दा कोई माड़ा असर नैई पौन दिता ऐ।

<><><><><><>

Investiture Ceremony

सेना दी उत्तरी कमान दा अलंकरण समारोह 2026 अज्ज उधमपुर स्थित मुख्यालय च आयोजत कीता गया। इस समारोह दी प्रधानता उत्तरी कमान दे प्रमक्ख लैफ्टिनेंट जनरल प्रतीक शर्मा हुंदे आसेआ कीती गई। समारोह दौरान कुल 93 पुरस्कार भेंट कीते गे- जिंदे च 52 व्यक्तिगत ते 41 बक्ख-बक्ख ईकाइयें गी दिते गे। एह ईनाम ऑपेशन सिंदूर सनेँ बक्ख-बक्ख क्षेत्रें च सेना दे बहादुरी आहले प्रदर्शन- निस्वार्थ सेवा ते देशभक्ती गी मान्यता दिंदे न। इन्ना गै नैई एह पुरस्कार भारतीय सेना ते एहदी ईकाइयें आसेआ प्रदर्शत असाधारण बहादुरी- विशिष्ट सेवा ते कर्तव्यनिष्ठा गी सम्मानित करने लेई समर्पत न। किट्ठे गी सम्बोधित करदे होई सेना कमांडर होरें पुरस्कार हासल करने आलें दे समर्पन-भाव ते चुनौतीपूर्ण ते मुश्कल हालात च अपनी ड्यूटी दे प्रति अनत्रुट वचनबद्धता लेई सराहना बी कीती।

<><><><><><>

IPL

IPL दा 19मां संस्करण अज्जै थमां शुरु होने जा'रदा ऐ जेहदा पैहला मैच संजा साइडे 7 बजे बेंगलुरु दे एम. चिन्नास्वामी स्टेडियम च मजूदा चैम्पियन रॉयल चैलेंजर्स बेंगलुरु ते सनराइजर्स हैदराबाद बश्कार खेडया जाहग। एहदे बाद अगले त्रंऊ दिनेँ दे मैच 29

तरीक गी मुम्बई इंडियंस ते कोलकाता नाइट राइडर्स बश्कार मुम्बई च- 30 मार्च गी गुवाहाटी च राजस्थान रॉयल्स ते चेन्नेई सुपर किंग्स बश्कार ते 31 तरीक गी गुजरात टाइटन्स ते पंजाब किंग्स बश्कार मकाबला चंडीगढ़ च होग।

<><><><><><>

Traffic Advisory

जम्मू ट्रैफिक पुलस नै कल 29 मार्च ऐतवारें बड्डले 5 बजे थमां दिने तकरीबन 11 बजे तगर आयोजित होने आहली जम्मू मैराथन 2026 लेई गड्डियें दी आओ-जाई मतल्लक किश बंदशें बारे इक सार्वजनिक नोटिस जारी कीता ऐ। 21 किलोमीटर- 10 किलोमीटर ते 5 किलोमीटर आली मैराथन द्रौड़ दे रस्तें पर गड्डियें दी आओ-जाई दी खुल्ल नैई होग। जम्मू ब्हाई अड्डे- रेलवे स्टेशन-साम्बा- कठुआ- नगरोटा ते होरनें इलाकें बक्खी जाने लेई वैकल्पिक रस्ते उपलब्ध करोआए गे न। तवी पुल सनें चौथा तवी पुल बी खुल्ले दा रौहग।

<><><><><><>

CM Border Tourism

मुख्यमंत्री उमर अब्दुल्ला होरें अज्ज विधानसभा गी जानकारी दिती जे सरकार करनाह गी सरहदी सैलसफे आली इक प्रमुख थाहर दे तौर पर विकसित करने दी योजना बना करदी ऐ। उ'नें रोमांचक ते कुदरत आधारित गतिविधियें लेई करनाह इलाके च मजूद बड़ी मती समर्थ दा हवाला बी दिता। सदन च पुच्छे गेदे इक सोआला दा परता दिंदे होई उमर होरें आखेआ जे करनाह इलाके च ट्रैकिंग- हाईकिंग ते पर्यावरण दे

अनुकूल सैलसफा दी बड़ी मती समर्थ ऐ- जेहदा लाह ठोआइयै खिते च सैलसफा ते मकामी अर्थबवस्वथा गी बढ़ावा दिता जाई सकदा ऐ। उ'नें आखेआ जे सरकार करनाह जनेह सरहदी इलाके दी समर्थ दा लाह ठोआने लेई कम्म करा'रदी ऐ तां जे मकामी बसनीके लेई कम्म-रोजगार दे मौके पैदा करने दे कन्नो-कन्नी सैलसफा गी बी बढ़ावा दिता जाई सके।

<><><><><><>